

Vorred an den Günsti- gen Läser.

Günstiger Läser/ ich will kurtz erzellen/ warauß dises mässen
synē grund vnd Fundament hatt. Erstlich wo du hin mäs-
sen wilt/ in die wytte/ höche/ tieffe vnd breite/ so must du
zwen Stend oder gemerck haben: vnd weñ du zwen Stend nimpst
vnd ein ort in die wytte/ höche oder tieffe missist/ so wirt es von
den zweyen Stenden vnd an das ort/ so du begärst zuwüssen/ wie
wyt es ist/ einen grossen Triangel geben. Als zu einem Exempel:
so du von beden Stenden, vnd an das ort/ so du begerst zumessen/
ein schnur zu allen dreyn orten zugist/ so geb es einen Triangel:
also gibt es auff dem Instrument einen verjüngten Triangel wie
du mit der Schur von beden Stenden/ vnd an das ort hinuß ge-
zogen hast/ wie man in den Figuren findet vffgerissen. So fol-
get in disem kurzen wercklin von der Höche eines Thurns/ oder
anderen Gebeuws wie auch ab einem Berg in die tieffe vnd wytte
zu mässen/ mit disem Instrument/ darvon in dem vorigen vff-
gangnen Büchlin nüchts geschriben/ vrsachen/ das es von wägen
der ylander zyt dazumal vnderlassen worden.

Man kan aber mit disem Instrument vß einem Thurn da
man zween Stend ob einanderen nemmen kan/ vff einmal in ein
Tieffe/ wytte/ höche/ vnd als an vil ort man wil mässen/ wie wyt
es an ein jedes ist/ das findet man glich auff dem Instrument
von jedem Stand/ wie in folgenden Capiteln zusehen.

Hiemit thun ich dich Günstiger Läser dem
Allmechtigen Gott befehlen.

Das